

Ontario Wiin Oshki Asiniikewin Odoonaakonigewin Asin Ganawenjigewin gaye Nishike Gaadibendaang Akiini Biminizha'iganan

Beshig gaawii-dojigaaniwang ima oshki asiniikewin onaakonigewin ewii nadamagemagag ge-maanzhisegin nake asiniike anokii'ogamigoon gaye igi nishike gaadibendamowaad akiini gawiin gaadagoonamowaad ini asiniike mazina'iganan ima odakiimiwang.

Iwe oshki asiniikewin onaakonigewin ogwaayaakosijigemagan iniwe nishike gaadibendamowaad akiini dago ziidonigemagan iwe gaa-ini-ozhi'oomagag asin anokii'ogamig gewiiji'igowaad nibiwaa' Ontario daazhiikewinan ji-odisaabadaamowaad iwe ji-ini-minosewaad awaashime obimaadiziw'niwang gaye gaawii-inaadiziwaad.

Iwe onaakonigewin giizhaabonigaade apii niswaa giyyagideg apii October 21, 2009 izhkwaaweweni egii'dazhidamowaad igi Standing Committee on General Government. Iwe dash Asiniikewin Aanjibii'igan Onaakonigewin, 2009 gii'izhise giji'ogimaakwe eminonaang iwe apii October 28, 2009.

Ontario wiin gaagii-aanjibii'igadenig *Asiniikewin Onaakonigewin* da- nadamagemagan ge-maanzhisegin nake igi nishike gaadibendamowaad akiini gawiin gaadagoonamowaad ini asiniike mazina'iganan ima odakiimiwang.

Ono gayaanjibii'igaadegin oga wii'ji'ogonaawaa igiwe bagona akiini gaadibendamowaad, dabagakinaagwaanoon weweni gebiminizha'igaaniwangin dojigewinan iwe nanandawaabajigewin dino anokiiwin, gaye da'ini'aagaasin gebigaamiseg iwe onji asiniike nanandawaabajigewin ima gaa-izhinaagoog bagona.

Ashenigewin ini Giji Ogimaakwe Asiniike Dibenjigewinan ima Shegoya'iing Nishike Ogidakamig Dibenjigewinan

Akiin ini nishike ogidakamig dibenjigewinan gaye giji ogimaakwe odoo-asiniike dibenjigewinan gaabaakisigin gakinawaajjigan dino minik baangii eta 1.4 bakwe ya'ii iwe akii nake Southern Ontario gaye awashime niisise iwe bakwe ya'ii minik Northern Ontario odakiim gaa-ini-gokwaanig. Aaniishwiin igo, giji ogimaa owaabadaan egiiwaashkwejigesenig gaye e-omigzshkwaaji'igowaad igiwe aaninda akiini gaadibendamowaad.

Wedi Southern Ontario, ogidakamig dino gaadibendamowaad nishike, iwe gaayaanjibii'igaadeg Asiniike Onaakonigewin shemaag asheseni giji ogimaakwe dino asiniikewin ima gakinawaajjigan. Megwaa gaa-ashodibendamowaajin gaye gaadi-

ba'amowaad mazina'iganesan giji-inendagonoon, dago gaye giiwesegin nake giji ogimaakwekang, dagiwe odaapinigaadewan ini shemaag. Nishike gaadibendamowaad akiini dagii mooshkinebii'igewaag ini nake Minister of Northern Development, Mines and Forestry ji-ashenigaaniwang iweni asiniikewin gaadibendang jigii-webaakisenig nake gaa-aashodibendang gaye nanandawaabajigewin. Onowe miinidiwinan Southern Ontario inaagidewan giji ogimaakwe eminonagin.

Nigaan wedi midaashiniizhin minik giizisoog, niinawind nigaa dibaajimomin iwe mazina'iigin ashodibendamowinan nake Southern Ontario jibagidinigaadegin ini gakinawaajijiganan mano ji-ashodibendagogin ima gebaakising jigi ogimaakwe odakiing memwej wiin jibiindiged gaye ji-waanajitood gegoon ima agotakamig ima akiing.

Wedi Northern Ontario, igi nishike gaa-dibendamowaad akiini dagii mooshkinebii'igewag jigiidebinamowaad iniwe giji ogimaakwe gaadakonangin asiniike dino dibendjigewinan jigii-ashenigaadegin ima ashodebinamowin. Oma nake akiing danagadawendam gegoonan daabshko aniin nake geizhiganawaabadeg asiniikewin jibwaa miiniding ini ashenigewinan. Minawaa, ini megwaa gaa-ashodibendamowaajin gaye gaadi-ba'amowaad mazina'iganesan da-giji-inendagonoon. Onowe miinidiwinan Northern Ontario gawiin da-inaagidesinnoonan giji ogimaakwe eminonagin, aniish iwe da'inaginde iwe nake jigii-minonaagoogiban iwe oshenigewin nake ga-ini-ozhijigaadegin gebiminizha'igadegin.

Iwe gayaanjibii'igaadeg Asiniikewin Onaakonigewin bagidinigemagan awashime jimaangibii'igaaniwangin ini minik akiinn gebaaksising gagakinawaajijiganan wiin e-inedazig awe Minister, ji-gii nagadawenimind igiwe gaadibendamowaad akiini wedi waasa nake gaa-izhi-maamawoobii'igadegin gaawii'izhijigaaniwang. Dago, nishike gaadibendang akiini mano jigii-baakising gagakinawaajijiganan, agota kamig gadibendamowaad dino dawindamowaawag giishpin gaa-dibendagoog gaa-ozhibii'igaadegwen ima nake gaa-dibendang, gaye dayadawendaagonoon gegoonan iniweni nanandawaabajigewin gaawii-dojjigaaniwang gaye mazina'iganesan jibwaa madanokiikadeg nanandawaabajigewinan ima akiing.

Asiniikewin ima Akiing Dino Diba'igewin Shaabosewin

Awashime aanjibii'igan ogawii'igoonawaa igi gaadibendamowaad akiini ogiibagidinan awe giji ogimaakwe iweni asiniike akiing, igi gaayaabajitoosigwaa iwe akiini ji-asiniikewaad, ji-mooshkinebii'igewaad iwe dino diba'igewin shaabosewin.

Minawaa ge-ini dojjigaaniwang

Nibiwaa iwe gayaanjibii'igaadeg asiniikewin onaakonigewin dagaashkijigemagan ge-izhijigaaniwang wegonen gebiminizha'igaadeg. Awe ogimaa ogaamaajitoon iwe ge-izhijigaaniwang ji gagwedwanaaniwang gaye ji-ozhijigaadeg iwe maya ima gebiminizha'igaadegin.

Ima nake shaabo biminizha'igewinan ogimaa oga-nigaanitoon ozhijigewin:

Asiniikeg Ge-onjigendamowaad gakino'amaagewin onji oshki gagwedweg gaye megwaa gaadakoonamowaad asiniike mazzina'iganesan. Weweni iwe ji-gakendamowaad onowe oshki onakonigewinan ima asiniikewin onakonigewin, gaye Anishinaabe wiijitaawin gaye gagwedwewin, giiwe'odaapinigewin ini onji nanandawaabajigewin nake, gaye gebiminizha'igaadegin apii gagakinawaajijigaaniwang gaye nanandawaabajiged ini asiniin ima nake ga-izhi nishike debendamowaad akiini.

Nanandawaabajigewin gawii-izhijigaaniwang gaye mazina'iganesan gaawii-nagajijigemagagin wiiba nake nanandawaabajigenaniwang debwe ini gaawii-dojigaaniwangin jigii-nanagadawenimind Anishinaabe gagwedwewinan, nishike gaadibendamowaad akiini wiinawaa ogiji-inendamowiniwaan gaye iwe jigwaayaakosijigaaniwangiban waanaajijigadeg aki.

Akii Mazina'igan dino gagakinawaajijigan jigii-gijiwseg iwe dino ataadiwin jidebingaaniwangin ini asiniike dibenjigewinan ima Ontario, megwaa dash jigii-webinigaadegiban iwe igi gaa'asiniikewaad memwej wiin jibiidigewaad ima akiing ji-ashodibendamowaad ini gedibendamowaad.

Ganoondiwin giyaabi da-izhise

Iwe gaagii-ozhijigaadeg oshki asiniikewin onakonigewin ji-onji minoseg iwe asiniikewin gaawii-ozhijigaaniwang ji-onji minosed gakina awiya oma nake Ontario, nigii-bizindaamin. Nigiji-inenimaanaanig igi gaadibenjigewaad, gaye nigii-maamawibii'aamin odikidoowiniwaan ima ozhibii'iganing.

Nigaagwedwewininan gaamashi izhkwaasesinoon. Owe gaa-ini-ozhitooyaangin onakonigewinan, awe ogimaa awaashime da-ini-izhijige jigagwejimaaji' ini gaadibenjigewaad dino, Anishinaabeg gaye gagina'awiya' debwe jiminoseg owe onakonigewin onji asiniikewin oma Ontario. Bebakaan dino ima ozhibii'igan dabiminizha'igaaniwaan geya'piijibii'igaaniwangin.

Iwe oshki Ontario Asiniikewin Onakonigewin miigiwese weweni iwe jidoodaagaaniwang asiniike ozhijigewin enanagajiseg gakina gaa-izhimisawenadmowaad, gaye eziidonigemagag ataadiwin dino jishipiseg inaadiziwin ima nake onji asiniike anokiiwin. Dawiji'iwemagan ima Ontario maawaaj jigii-onizhishing apane ji-mino asiniiked gaye shooniya bagidinigewin oma miziwe akiing.

Geyapiijimagag ono Geyaanjisegin

Owe ge'izhiseg giji ogimaakwe egoominonaang:

Gaagiiyaanjibii'igaaniwang maano jigii-nanadokii'inaniwang, gakinawaajijiganiwang gaye nanandawaabajigewin iwe ewii-ozhijigaaniwangibaniin ini asiniikewin, maya jigii-ganawaabadeg gaye gejinaaj jigi-jiwsegibaniin ini Anishinaabe omiinigoowziwinan gaye odiba'amagowinan ima chakibii'igan 35 ima giji onakonige mazina'iganing, 1982, gaye iwe gagwedwewin, gaye jigii-agaasiseg iniwe gebigaamiseg ima onji izhijigewinan nake mino'ayaawin gaye oma akiing.

Giizhaad da'azhesewan ini giji ogimaakwe asiniike odibejigewin ima shegoya'ii nishike gaadibenjigaadegin dinowaa ima Southern Ontario.

Ozhki aanjibii'iganan onji maajijigewinan ima shegoya'ii Asiniikewin Onaakonigewin

Ozski aanjibii'iganan onji gaa-onizhizhid asiniins odibenjigewin dino bimiwijigewin.

Ge-izhiseg ishkwaaw ini onaakonigewinan ozhijigaadegin:

Apii ingo-biboonagaag

Dadibaadoonde mazina'iigino gakinawaajijigewin ima Southern Ontario

Gebiminizha'igadeg apii mooshkinebii'igaaniwang ji-azhe odaabinigaaniwang iwe giji ogimaakwe asiniike odibenjigewin ima shegoya'ii nishike gaagi-jiwinaangin dino ini ima Northern Ontario

Aanjibii'igan ini akiin gaabaak'sisigin jigii-gaginawaajijigaadegin gaye nanandawaabajigewin.

Ozhki aanjibii'iganan jigii-bagidinigaadegibaniin ini ogidakaamig gaginawaajijigaadegin jiyaabadagin bakaan jigii-inaawdegin daabshko ozhki waasigan dino izhijigewinan gaye jiganaawedaagogin ini Anishinaabe gaa'inaadizid dino.

Apii niizhin ako niso biboonagaag

Nanandawaabajigewin izhijigewinan gaye mazina'iganesan ga-onaakonigemagagin ini nitam nake anandawaabajigewin debwe jigii-izhisegin ini nanandawaabajigewin ji-ini bimiwijigaaniwangibaniin weweni jigii-ganawaabadeg Anishinaabe gagwedwewinan, nishike gadibendamowaad akiini gaamisawendamowaad gaye jigii-gwayaakosijigaaniwangiban wanashkweseg gegoon ima akiing. Anishinaabe gagwejimiwewin daniigaansijigaade apane owe asiniikewin gawiidodagaaniwang.

Da-ozhijigaaniwan ge-onji wiindamaawindaaw igi gagijiwinaamowaad asiniike mazina'iganesan, jigii-weweni wiindamaawindaaw aniin ge-izhijigewad ima shegoya'iiing Asiniike Onaakonigewin. Dadagonigaade dibaajimowin ini geyadawendaagogin aniin geyayizhiinaaniwang anishinaabe dagwiid gaye gagwedwewin, giwe'odaapinigewin ini onji nandawaabajigewining, gaye gebiminizha'igadegin iwe wii-gaginawaajijiged akiini gaye nanandawaabadang asiniin ima nishike akiising.

Apii nisin ako nanaan'nibiboonagaag

Maamaakaadaabikoong nake dagii-dodagaaniwan akii mazina'igan wii-gaginawajibii'aang akiini amii weweni ji'izhiseg miziwe Ontario iweni asiniikewin gawii-gagina'waajidood.

Giishpin awashime gegoon wiigigendaman, ganoonz:

Robert Merwin

Director, Mining Act

Giigidowin: 416-327-8266

705-670-5627

Maajiiyaasijigewin: 416-327-0634

Maamaakaadaabikoong: miningact@ontario.ca